



Gemeinsam Äntwert vun der Ministesch fir Ëmwelt, Klima an nohalteg Enwécklung a vum Minister fir Landwirtschaft, Wäibau a ländlech Entwécklung op d'parlamentaresch Fro n°6014 vum 1. Abrëll 2022 vun dem éierwäerten Deputéierten Här Marc Goergen iwwert "Chemins forestiers"

1) Handelt et sech beim Projet ëm e Bëschwee vum Profiltyp "plat"? Falls jo, wéi kann et sinn, dass, bei enger Breet vu 3,50m an enger Längt vun 3,7km, 1400 Meterkaree u "Geotextil" verbaut ginn?

Et handelt sech bei der Phase 2 vum Remembrement "Clervaux" ëm eng Opwärtung vu besteende Bëschweeër a Réckeweëër. Dobäi ginn déi besteend Weeër op enger Breed vun 3,5 Meter an op enger Déift vu 40 cm an d'Rei bruecht a stabiliséiert. Et handelt sech hei ëm e Profiltyp "plat". "Plat" heescht hei, dass de Wee flaach ass an dass d'Waasser mat enger liichter Pente mat 3% vum Hang ewech offléisst. De Profiltyp huet näischt mam Coffrage ënnendrenner ze dinn. An der Soumissioun ass mol virgesinn, 1400 m² Geotextil punktuell op bis zu enger Längt vun 350 m (=1400/4) nëmmen do anzubauen, wou et technesch gesinn erfuerderlech ass. Dës Quantitéit baséiert op Erfahrungswärter a kann nach variéieren.

2) An der parlamentarescher Fro n°1272 gëtt dorop opmierksam gemaach, dass en onofhängege Büro den Impakt vun esou Projeten ob d'Ëmwelt evaluéiert. Wäert d'Ministesch den Deputéierten Asiicht an dës Impaktstudie ginn?

D'Impaktstudie vum Land (Februar 2013) a Bësch (Januar 2016) goufen nom "Règlement grand-ducal du 7 novembre 2007 fixant le contenu, les conditions et les modalités de réalisation de l'étude d'impact prévue en matière le remembrement des biens ruraux" opgestallt. Dem Gesetz no (Loi du 25 novembre 2005 concernant l'accès du public à l'information en matière d'environnement) ass all Impaktetüd aus dem Umweltberäich fir de Public zougängelech.

3) Wéi héich sinn d'Käschte vun den 1400 Meterkaree "Géotextile" an den 1350 Kubikmeter "Matériaux pierreux de la région", déi fir de Bëschwee gebraucht ginn? Wou kommen dës Materialien hier?

Et gëtt intern mat de Wärter vun deene leschte realiséierte Phasen geplangt. Déi Präisser sinn also geschat mat +- 2.100 € fir déi 350 m Geotextil an +-51.300 € fir d'Gestengs. Do wäeren d'Fourniture an d'Abaue mat dran. Déi 1350 m³Gestengs si fir +-1.5 km Wee virgesinn. Natierlech kënnen dës Montanten an der aktueller Soumissioun nach variéieren, well jo verschidde Präisser ugezunn hunn.

D'Gestengs ka vun enger Carrière, Chantieren oder dem Entrepreneur sengem eegenen Depot kommen. Och recycléiert Material ass méiglech. Et däerf net kontaminéiert sinn a muss geologesch identesch mat dem Ënnergrond vun der Platz, wou et agebaut gëtt, sinn.

4) Bëschweeër ginn oft en vue vu wirtschaftlechen Ureizer amenagéiert, ass dëst hei och de Fall? Falls jo, wat fir ee wirtschaftleche Gewënn gëtt sech duerch dësen zousätzleche Bëschwee an déi domadder erschlosse Gebidder erwaart?

De Bëschremembrement zu Klierf ass een Deel (175 ha) vun engem Land-Bëschremembrement (Total vun 800 ha), deen am Kader vum Bau vun der Transversale Maarnech-Klierf opgestallt gëtt. De Staat kritt iwwer de Remembrement de Couloir fir seng Umgeungsstrooss, am Géigenzuch investéiert hien an d'Infrastruktur vun der Land- a Bëschwirtschaft, fir de liichte Flächeverloscht duerch eng Produktivitéitserhéijung ze kompenséieren. Gläichzäiteg gëtt awer och ekologesch opgewäert. D'wirtschaftlech Plus-Value fir de Kanton an d'Besëtzer ass de Fait, dass d'Mobilitéit am Bësch vereinfacht gëtt (Spadséierweeër, Mountainbiking, Transport a Beweegung vun de Bëschmaschinen) an och exklusiv op déi Weeër drainéiert gëtt. Den Aarbechtsopwand gëtt substantiell verkierzt. D'Bëscher gi reegelméisseg an d'Rei bruecht, hiren Zoustand



verbessert sech, a grouss Coupe kënnen evitéiert ginn. D'Exploitatioun gëtt vereinfacht, d'Holzverwertung rentéiert sech och fir méi kleng Quantitéiten, a krank Beem kënnen méi séier ersat ginn. De geneeë Montant vun der Plus-Value hänkt dann natierlech och vum aktuellen Holz- an Energiepräis of (Diesel asw.).

5) Wéi ass dëse Projet am Zesammenhang mat dem vum Ëmweltministère decidéierte Moratoire op nei Weeër duerch de Bësch ze verstoen? Handelt et sech bei dem betroffenen Ofschnëtt net ëm en ëffentleche Lafholz-Bësch?

De Moratoire op nei Bëschweeër concernéiert nëmmen déi ëffentlech Lafholzbëscher. An dëser Phase 2 ass just een neien einfache Réckeweeg mat enger Breed vun 3 m op enger Längt vun 150 m virgesinn (Lieu-dit Geeschtert). De Gros vun dëser Phase 2 (3,55 km) existéiert also haut schonn. Den Deel "Klausberg" ass effektiv ëffentleche Bësch, mee do gëtt op engem stabille Wee just déi iewescht Couche an d'Rei bruecht, also kee neie Wee.

Lëtzebuerg, de 4. Mee 2022

Joëlle Welfring

Ministesche fir Ëmwelt, Klima an nohalteg Entwécklung